

Tiraduras sursilvanas han tratg sin il punct

Tar il campiunadi grischun arma e pistola 10 meters è vegnids sajettads sonda passada resultats excellents. Campiunessa grischuna è vegnida tar l'elita cun l'arma pneumatica Annina Tomaschett – sco gia avant in onn.

Gion Nutegn Stgier/FMR

A Landquart è sa mesirada sonda passada l'elita chantunala per eruir ils campions e las campionesas grischunas da la distanza da 10 meters cun il schluppet pneumatic e la pistola ad aria cumprimida. Tar l'occurrenza è sa mussà che la generaziun giuvna da tir dal Grischun è sin la dretga via per tegnair ina giada pitg alla concorrenza naziunala. Per l'avegnir èn ils juniors e las junioras da la Federaziun Grischuna dal Sport da Tir in bun chapital.

Danovamain campionesa grischuna

Tar l'elita han ils otg pli fermes tiradurs e las pli fermas tiraduras sajettà il final cun l'arma pneumatica. Gudagnà l'occurrenza ha gia sco avant in onn *Annina Tomaschett* (Trun). La commembra dal cader naziunal svizzer ha fatg cun 250,3 puncts in resultat excellent ed in nov record grischun. *Lars Färber* (Favugn), l'antierur commember dal cader naziunal svizzer ha già disfortuna cun avair in defect tar l'arma e già da terminar pervia da quel la lutga suenter 17 culps. Fin lura han el e Tomaschett sajettà fitg equilibrà. *Elena Tomaschett* (Rabius) è vegnida sin plaz dus, e cumpletta il podest ha *Carina Caluori* (Panaduz). *Martina Herrli* (Tavau) ha gist declassà ils concurrents e las concurrentas tar ils juniors. Vicecampionesa grischuna è vegnida *Chiara Weishaupt* (Degen) e la medaglia da bronz ha gudagnà *Anja Cadalbert* (Sevgein). La categoria arma pneumatica pusada ha gudagnà *Silvio Städler* (San Murezzan). *Hans Peter Rieder* (Maloja) è vegnì segund e sin il podest è er anc stà il favorit *Alessandro Rotta* (Vicosoprano).

Ulteriur titel per Elmar Fallet

Ina giada dapli campion grischun è vegnì *Elmar Fallet* (Müstair). El ha en sia carriera gudagnà nundumbraivlas occurrenzas chantunalas e naziunalas e sonda passada vegnì sco savens campion grischun tar l'elita pistola 10 meters. *Nando Flütsch* (St. Antönien) ha fatg cun 235,3 puncts 1,4 puncts damain che Fallet e retschet la medaglia d'argient. Quella da bronz è ida a Müstair tar *Roman Clavadetscher*. Tar ils juniors è *Mario Wolf* (St. Antönien) vegnì surpudentamain campion grischun. Tar ils veterans è il titel da campion chantunal ì a *Romano Giovanoli* (Vicosoprano). La categoria U17 arma pneumatica ha gudagnà *Alicia Beer* da la Societad da tir voluntaria Trun.